

Dithero tsa Tirelano mo Kutlwanong

Thero ka Sontaga o o bidiwang Eksaudi, e le ka 20. 05. 2012

28/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 34 - 32/31
2. **Thapelo:** Morena, Modimo, Rraetsho yo o mo legodimong, re a go leboga, ka o solofeditse ka moporofeti wa gago gore o tla dira kgolagano e ntšhwa le ba morafe wa gago ka go kwala molao wa gago mo dipelong le mo maikutlong a batho ba gago, ka go itshenolela mo go bone, ka go ba itshwarela dibe tsa bone. Re a go leboga, ka o dirafaditse tsholofetso ya gago ka go romela Morwao yo o rategang mo lefatsheng go re baakanyetsa boitshwarelo jwa botlalo ka botsalo, le loso, le tsogo ya gagwe, ka go re tlhomamisetse Lefoko la thuanjo, le kolobetso, le selalelo sa mmele le madi a gagwe, le ka go goromeletsa Mowa o o Boitshepo mo ponatshegong ka moletlo wa Pentekoste go nna Moruti, Mokgothatsi, le Mogomotsi wa rona ka Lefoko le le boitshepo la gago. Morena, budulola matlho a rona, o be o kabolole ditsebe tsa rona, re tle re lemoge dikgagamatso mo molaong wa gago o re o senoletswe mo thabeng ya Sinai, le mo go ona o re o senoletswe mo thabeng ya kwa Golegota, ya kwa Sione, o o tlogile kwa Jerusalema go isiwa mo mafatsheng otlhe le mo merafeng yotlhe ka thero ya boikwatlhao le boitshwarelo mo leineng la ga Jesu. O re utlwe ka ntsha ya gagwe. Amen.
3. Epistolo ka fa thulaganyong ya 2 e kwadilwe mo go Baefeso 3:14-21;
Efangele ka fa thulaganyong ya 1 e kwadilwe mo go Johane 15:26-27; 16:1-4.
4. A go ipolelwe tumelo ya bokeresete!
5. Sefela sa 150 - 133 / -
6. Thapelo ya mmadi wa thero.
7. **Lefoko** ka fa thulaganyong ya 4 le kwadilwe mo go Jeremia 31:31-34, le re: "'Bonang, malatsi a e tla,' go bua MORENA, 'a ke tla dirang kgolagano e ntšhwa le Baiseraele le Bajuta ka ona; e seng kgolagano e e tshwanang le e nkileng ka e dira le borraabo ka letsatsi le ke ne ke ba tshwere mabogong ka lone go ba ntsha kwa lefatsheng la Egepeto; gonne ba robile kgolagano ya me, le fa ke ne ke le Morena wa bone.' MORENA o buile jalo. 'Mme kgolagano e ke tla e dirang le Baiseraele fa morago ga malatsi ano ke ya gore: Ke tla tsenya molao wa me mo maikutlong a bone, ke o kwala mo dipelong tsa bone; ke tla nna Modimo wa bone, mme bone ba tla nna morafe wa me.' MORENA a re jalo. 'Go tla bo go sa tlhole go le ope yo o rutang mongwe-ka-ene gongwe morwa-rraagwe a re: 'Itse MORENA!' Gonne ba tla nkitse botlhe, ba banyie le ba bagolo ba bone,' go bua MORENA. 'Gonne ke tla ba itshwarela molato wa bone, ke sa tlhole ke gopola maleo a bone.'" Amen.
8. **Thero:** Barategi mo Moreneng wa rona Jesu Keresete, monongwaga re utlwa tsholofetso ya go solofediwa kgolagano e ntšhwa ka Sontaga wa Eksaudi. Ka tlwaelo ya dinyaga tse di fetileng re ne re utlwa Lefoko leo ka letsatsi la go tlhomamisediwa selalelo sa Morena. Ka lona lele go ne go tiisiwa gore re dirafaditswe tsholofetso eo ya Modimo ka go tlhomamisediwa kgolagano e ntšhwa ka loso le tsogo ya Morena Jesu, le ka go tlhomamisediwa selalelo se se boitshepo sa mmele wa ga Keresete, le madi a gagwe a e leng madi a kgolagano e ntšhwa a re a tshologelelwe go nna boitshwarelo jwa dibe. Kajeno ka Sontaga wa Eksaudi, e le Sontaga wa go ipaakanyetsa moletlo wa Pentekoste, e le Sontaga wa go kopa Modimo gore o re utlwe, o re abele Mowa o o Boitshepo, e le Sontaga wa go gopola ditsholofetso tsa Morena Jesu tse a solofeditseng ka tsona a ise a tlhatlogela kwa legodimong gore o tla romela barutwa ba gagwe Mowa o o Boitshepo wa gagwe, ka Sontaga wa kajeno **tsholofetso ya kgolagano e ntšhwa e tlhalosiwa bogolo ka go kopanngwa le neo e kgolo ya Mowa o o Boitshepo.** Re utlwa ka ga Mowa o o Boitshepo gore
 1. ke ona o e leng neo e kgolo ya kgolagano e ntšhwa.
 2. ke ona o e leng tota Moruti wa kgolagano e ntšhwa.
 3. ke ona o e leng Mogomotsi wa kgolagano e ntšhwa.

1. Mowa o o Boitshepo ke ona o e leng neo e kgolo ya kgolagano e ntšhwa. Bana ba Isaraele, Modimo o dirile kgolagano le bone mo thabeng ya Sinai, wa ipofa go nna Morena le Modimo wa bone, mme bone ba ne ba tlola kgolagano gantsi le ka mekgwa e mentsi. Lefoko la kajeno e re: ba robile kgolagano ya Modimo, le fa 20. 05. 2012 / ka Sontaga o o bidiwang Eksaudi

ona e ne e le Morena wa bone, le fa Modimo o buile le bone gantsintsi fela ka go ba romela Lefoko la ona ka molomo le ka seatla sa baporofeti. Ka moo Modimo o solofeditse go dira kgolagano e ntšhwa le bone, e se kgolagano ya molao wa kwa Sinai, mme e le kgolagano ya molao wa thaba ya kwa Golegota, ya kwa Sione, ya kwa Jerusalema. Ke gona Morwa Modimo a tlileng, a swela mo thabeng ya kwa Golegota mo sefapaanong, a re tlhomamisetsa madi a gagwe a e leng a kgolagano e ntšhwa mo selalelong sa gagwe. Madi a ga Jesu a re a nwang mo selalelong a kopantswe le Mowa o o Boitshepo, fa re utlwa mo go 1 Bakor. 12:13 gore "rotlhe re nositswe Mowa o le mongwe fela." Ya re Jesu a sena go tlhomamisa selalelo se se boitshepo, a bua mafoko a le mantsi a go solofetsa gore o tla roma Mowa o o Boitshepo, jaaka lona le le reng: "Nna ke tla rapela Rara, mme o tla lo naya Mogomotsi yo mongwe gore a nne le lona ka bosakhutleng, e bong Mowa wa nnete," Joh. 14:16. Ya re Jesu a sena go tsoga, a tla mo barutwang ba gagwe, "a ba budulela, a ba raya a re: 'Amogelang Mowa o o Boitshepo! Ba lo ba itshwarelang dibe tsa bone ba di itshwaretswe; mme ba lo ba balelang dibe tsa bone ba di baletswe,'" Joh. 20:22-23. Ka moletlo wa Pentekoste Mowa o o Boitshepo o goromeleditswe mo barutwang ba ga Jesu ka tsela e e gakgamatsang mo ponatshegong, wa bonwa ka diteme tsa molelo, wa utlwiwa ka mosumo teng kwa Jerusalema. Ka letsatsi leo ga buiwa le tsholofetso e kgolo e e kopanyang neo e ntle e ya Mowa o o Boitshepo le kolobetso mo leineng la ga Keresete, ga tse: "Tlhabologang, mme a mongwe le mongwe wa lona a kolobediwe ka leina la ga Jesu Keresete go bona boitshwarelo jwa dibe tsa lona, mme lo tla amogela neo ya Mowa o o Boitshepo," Dit. 2:38. Ka mafoko ao re utlwa sentle gore neo ya Mowa o o Boitshepo e kopanngwa le Lefoko la boitshwarelo jwa dibe, le kolobetso, le selalelo. Tota Mowa o o Boitshepo ke neo e kgolo mo sebakeng sa kgolagano e ntšhwa, mo phuthegong ya ga Keresete e Lefoko la Modimo le rerwang ka tshwanelo mo go yona, e disakramente di abelwang ka fa tlhomamisong ya tsona mo go yona.

2. E bile ke ona o e leng Moruti mo sebakeng sa kgolagano e ntšhwa. Ke ona o o tsenyang molao wa Modimo mo maikutlong a batho, ke o o kwalang mo dipelong tsa bone gore ba lemoge, fa Modimo o e leng ona e le Modimo wa bone, fa bone e le ba morafe wa ona. Fa re leba fela mafoko a tsholofetso eo mo moporofeting Jeremia, go ka dirafala gore motho a gopole gore Mowa o o Boitshepo o dira tiro eo e kgolo ya ona, o ka re o e dira fela, mme rona Balutere re itse sentle gore ga o dire fela tiro eo, mme o e dira ka go dirisa Lefoko la ona, le kolobetso, le selalelo sa Morena. Mowa o o Boitshepo o dirisa Lefoko la molao gore batho ba lemoge maleo a bone, le tatlhego ya bone, o dirisa Lefoko la Efangele gore batho ba lemoge lorato lwa Modimo, ba utlwe gore Jesu o ba letlantse, le go ba ruanya le Modimo ka loso lwa gagwe. Mowa o o Boitshepo o dirisa kolobetso mo leineng la Modimo Rara le Morwa le Mowa o o Boitshepo gore ba tsalwe sešwa ka metsi le ka Mowa. Mowa o o Boitshepo o dirisa Lefoko la boitshwarelo mo leineng la ga Jesu le mmele wa ga Keresete le madi a gagwe gore ba tlhomamisediwe mo tumelong ya go ikanya ka pelo yotlhe gore ba itshwaretswe maleo, ba amogetswe ke Modimo go nna bana ba ona. Ka tsela eo Mowa o o Boitshepo o gogela batho mo boammaaruring jotlhe, o ba goga mo go jona. Ga o bue ka bogaona, mme o bua tsotlhe tse o di utlwang mo go Keresete, o itsise batho dilo tse di tlang. O galaletsa Keresete. O itsise batho tse o di tsayang mo go tse e leng tsa ga Keresete. Ka tsela eo Mowa o o Boitshepo ke Moruti mo sebakeng sa kgolagano e ntšhwa. Fela jalo ga re tlhole re rutana ka tsa rona, mme tse di rutiwang mo phuthegong ya ga Keresete mo sebakeng sa kgolagano e ntšhwa ke tsona tse di senotsweng ke Mowa o o Boitshepo mo Lefokong la ona.

3. Ka tsela eo, e bile ona ke Mogomotsi wa nnete mo sebakeng sa kgolagano e ntšhwa. O gomotsa batho ba kgolagano e ntšhwa ka go ba bolelela ka thanolo gore "Modimo o ba itshwarela molato wa bone, ga o tlhole wa gopola maleo a bone." Ga re kgone go ikgomotsa ka tsa rona, mme re gomodiwa ka tse re di direlwang ke Modimo. Ga re kgone go itse kgomotso ka tsa rona, mme re bolelelwa ka Lefoko la Mowa o o Boitshepo gore Modimo wa nnete ke mang. Ke yona kgomotso e e gomotsang tota. Ke sona se re se ipolelang mo tumelong ya bokeresete, fa re na le Modimo o e leng Rara, le Morwa, le Mowa o o Boitshepo. Ka ona re na le boitshwarelo jwa dibe. Mo phuthegong ya bokeresete re itshwarelwa dibe ka malatsi otlhe mmogo le badumedi botlhe. Mo go yona re na le tsholofelo ya tsogo ya baswi le botshelo jo bo sa khutleng. Ka go re senolela tse tsotlhe tseo ka Lefoko la ona Mowa o o Boitshepo ke Mogomotsi wa nnete tota mo sebakeng sa kgolagano e ntšhwa.

Ka tsela eo re bonye gore Lefoko le re le tlwaetseng gore le kopantswe le tlhomamiso ya selalelo se se boitshepo, le tsamaelana sentle le Sontaga wa kajeno o e leng Sontaga wa go ipaakanyetsa moletlo wa Pentekoste, re tle re tlhomamisediwe sentle mo kitsong ya go itse gore re direlwang ke ona Mowa o o Boitshepo o e leng neo e kgolo ya Modimo, le Moruti, le Mogomotsi wa nnete tota. O re senoletse gore Jesu

ke Morena le Mopholosi wa rona. O a re ruta gore re itse Jesu, o re gomotsa ka tse re di diretsweng ke Jesu. Amen.

9. **Thapelo:** Morena Jesu Keresete, re a go leboga, ka o re solofeditse Mowa o o Boitshepo wa gago. O re thuse gore re amogele tsholofetso eo ya gago ka tumelo, re ipaakanyetse ka boikwatlhao le ka tumelo go dira moletlo wa Pentekoste ka boitumelo jo bogolo. Amen.
Thapelo ya Morena: Rara wa rona yo o mo legodimong ...

10. Sefela sa 148 - 131/144

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber, ka ngwaga wa 1994/ 1994/2006
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.